

Gjaldskrá þessi gildir í skipulögðum hverfum. Sé um óskipulagt svæði að ræða eða aðstæður óeðlilegar, skal greiða heimtaugargjald samkvæmt kostnaðarreikningi.

Heimtaugargjald skal greitt við umsókn.

IV. ÝMIS ÁKVÆÐI

Hafi gjald samkvæmt gjaldskrá þessari eigi verið greitt, svo að til lokunar hafi komið fyrir veitu, skal taka gjald fyrir enduropnun, kr. 300.00.

Ef fundin eru óleyfileg eða of stór vör við skoðun, skal veitunni lokað tafarlaust, og verður hún ekki enduropnuð, fyrr en notandi hefur greitt gjald, kr. 300.00 til rafveitunnar.

Söluskattur er innifalinn í gjaldskránni svo og viðlaggjald skv. lögum nr. 4/1973. Söluskattur og viðlaggjald reiknast ekki af seldri raforku til húshitunar.

Gjaldskrá þessi staðfestist hér með samkvæmt vatnalögum nr. 15 20. júní 1923, og Orkulögum nr. 58 29. apríl 1967, til þess að öðlast gildi þegar í stað, og birtist til eftirbreytni öllum, sem hlut eiga að máli. Jafnframt fellur úr gildi gjaldskrá fyrir Rafveitu Eyrarbakka nr. 81 7. apríl 1972, Rafveitu Stokkseyrar, nr. 82 7. apríl 1972, Rafveitu Hveragerðis nr. 84 7. apríl 1972 og Rafveitu Selfoss nr. 83 7. apríl 1972.

Iðnaðarráðuneytið, 15. marz 1973

Magnús Kjartansson.

Jóhannes Guðfinnsson.

REGLUR

um sumardvalarheimili barna og sumarbúðir.

1. gr.

Sumardvalarheimili telst hvert það heimili, sem tekur 5 börn eða fleiri til sumar-dvalar. Börn starfsfólks við sumardvalarheimili teljast með sumardvalarbörnum, enda búi þau ekki í séríbúð.

Menntamálaráðuneytið veitir heimild til stofnunar og rekstrar sumardvalarheimilis að fengnum meðmælum hlutaðeigandi barnaverndarnefndar og (héraðs)læknis og með samþykki Barnaverndarráðs Íslands.

Sama gildir um stofnun og rekstur svonefndra sumarbúða, að því leyti sem við á, en aðalmunur á þeim og sumardvalarheimilum er sá, að þær eru venjulega reknar fyrir fleiri börn, sem skipt er í flokka og um skemmri tíma, t. d. 2—3 vikur fyrir hvern flokk.

2. gr.

Eigi er heimilt að taka börn yngri en 6 ára til dvalar á sumardvalarheimili eða í sumarbúðum. Þó skal heimilt að taka yngri börn að fengnu sérstöku leyfi menntamálaráðuneytisins, enda séu þá gerðar auknar kröfur með tilliti til fjölda starfsfólks og sérþekkingar þess í meðferð ungra barna.

Séu mörg börn á sumardvalarheimili eða í sumarbúðum, 25 eða fleiri, skal lærð fóstra eða fóstrur, eftir ákvörðun ráðuneytisins hverju sinni, starfa á heimilinu, eða annað starfsfólk með hliðstæða menntun og/eða reynslu.

3. gr.

Umsóknum á þar til gerðu eyðublaði um heimild til þess að reka sumardvalarheimili eða sumarbúðir skulu fylgja:

1. Greinargóð umsógn barnaverndarnefndar um heimilið, þar sem komi skýrt fram álit hennar á hæfni og aðstæðum heimilisins til þess að taka börn til sumardvalar.
2. Heilbrigðisvottorð heimilisfólks.
3. Umsógn (héraðs)læknis um:
 - a) húsakynni, upphitun, hreinlætistæki, húsrými, m. a. til innileikja, þegar veður hamlar útivist, og annað í því sambandi, sem að dómi læknis skiptir máli,
 - b) brunahættu og aðra slyshættu,
 - c) hæfilegan fjölda barna miðað við gildandi reglur. Sakavottorð umsækjanda (í fyrsta sinni).

Leyfi til rekstrar heimila gilda til eins árs í senn.

4. gr.

Húsakynni skulu fullnægja eftirfarandi lágmarksskilyrðum:

- a) drengir og stúlkur skulu vera sér um svefnherbergi,
- b) hvert barn skal sofa sér í rúmi, börn mega ekki sofa í svefnpokum, ef dvalartími er lengri en hálfur mánuður. Ávallt séu þá í þeim hrein ver,
- c) börn mega ekki sofa í svefnherbergjum heimilisfólks, nema börn starfsfólks hjá foreldrum sínum,
- d) í svefnherbergjum mega ekki vera háarúm nema hæð herbergisins sé 2.50 m eða meira, og þá því aðeins, að minnst 1.80 m fjarlægð (gólflötur) sé á milli rúmstokka. Aldrei má vera nema eitt háarúm yfir hverju rúmi. Þar sem ekki eru háarúm, skulu vera minnst 0.90 m á milli rúmstokka,
- e) ekki má sofa í borðstofu eða öðrum herbergjum, sem börn eða starfsfólk (heimilisfólk) notar sameiginlega,
- f) börn skulu hafa aðgang að baði og vatnssalerni,
- g) skylt er að hafa einangrunarherbergi.

5. gr.

Ekki má hefja starfrækslu sumardvalarheimilis og sumarbúða, nema leyfisbréf fyrir starfrækslunni og heilbrigðisvottorð heimilis- og starfsfólks séu fyrir hendi.

Forstöðumaður eða kona skal og krefjast heilbrigðisvottorðs með hverju barni, sem tekið er til sumardvalar.

Ef heilbrigðisvottorð fylgir ekki barni, skal umsvifalaust fá (héraðs)lækni til að athuga heilbrigði þess.

Ávallt skal leyfisbréf og læknisvottorð vera til staðar, svo að eftirlitsmenn geti séð þau án tafar.

6. gr.

Barnaverndarnefndum ber að veita forstöðufólki sumardvalarheimila og sumarbúða upplýsingar og leiðbeiningar eins og við verður komið. Þær skulu fylgjast rækilega með rekstri slíkra heimila í umdæmi þeirra og koma á þau minnst tvisvar á sumri og oft, ef þörf gerist, til þess að kynna sér sem bezt aðbúð og líðan barnanna og beita sér fyrir því, að bætt sé þegar í stað úr ágöllum, ef í ljós kunna að koma. Ef svo alvarlegar misfellur koma fram í rekstri barnaheimilis, að nefndinni þyki orka tvímælis, hvort rétt sé, að það starfi áfram, skal hún tafarlaust gera Barnaverndarráði Íslands viðvart.

Kostnaður vegna eftirlits barnaverndarnefnda greiðist af hlutaðeigandi dvalarheimili, nema eftirlitið sé falið öðrum.

7. gr.

Í lok hvers rekstrartímabils slíkra heimila, skal forstöðumaður senda hlutaðeigandi barnaverndarnefnd og Barnaverndarráði Íslands skýrslu um reksturinn. Skulu þar m. a. tekin fram nöfn, aldur og heimili forstöðufólks, starfsfólks og barna, svo og dvalartími þeirra. Þá skulu tilgreind dvalargjöld.

8. gr.

Ekki má hafa fleiri en 6 börn til jafnaðar á starfsmann. 15 ára gæzlumanni má ekki ætla fleiri en 5 börn til jafnaðar og 14 ára ekki fleiri en 4 börn. Ef þvottur á fötum barna er utan heimilis má vera einu barni fleira á mann.

9. gr.

Sumardvalarbörn skulu vera undir eftirliti úti og inni. Forstöðufólk ber ábyrgð á börnunum frá því heimilið tekur við þeim af foreldrum og þar til þau eru komin í umsjá foreldra sinna að nýju.

Annist forstöðumaður slíkra heimila flutning barna að heimilinu eða frá, skal hann sjá um að gætt sé fyllsta öryggis við flutninginn og aðbúð barnanna við flutninginn sé sem best.

10. gr.

Fulltrúi frá Barnaverndarráði Íslands skal a. m. k. einu sinni á sumri koma á sumardvalarheimili, sem fengið hafa starfsleyfi til leiðbeiningar og eftirlits.

Skal hann kynna sér allan aðbúnað barna á heimilunum og að fylgt sé í öllu ákvæðum laga og reglna um barnaheimili. Forstöðufólki er skylt að afhenda eftirlitsmanni barnaverndarráðs skrá yfir fjölda þáverandi starfsfólks, aldur þess og heimili. Eftirlitsmönnum er skylt að skila skriflegri umsögn um athugunir sínar á heimilum til barnaverndarráðs.

11. gr.

Brot á framanskráðum reglum geta valdið leyfissviptingu.

12. gr.

Reglur þessar eru settar með skírskotun til laga nr. 53/1966 og reglugerðar nr. 105/1970, um vernd barna og ungmenna, og öðlast þegar gildi. Jafnframt falla úr gildi reglugerðarákvæði, er kunna að brjóta í bága við reglur þessar.

Menntamálaráðuneytið, 18. marz 1973.

Magnús T. Ólafsson.

Birgir Thorlacius.